

La Lettre Jèrriaise, lé trente du mais d'Novembre 2024

Bouônjour bouonnes gens, ch'est Charlot L'Maistre aue la lettre Jèrriaise aniet, lé trente du mais d'Novembre deux milles vîngt-quatre.

J'espéthe qué tout l'monde aiment bein les prépathâtions pour Noué. Vraîment, aniet L'Office du Jèrriais, il' ont eune halle dans Lé Vièr Marchi comme partie d'la Fête dé Noué où' est qu'ou pouôrrez actater des p'tits présents Jèrriais pour ta fanmil'ye ou l's anmîns. Étout, à deux heuthes un quart i' y' étha des cantiques dé Noué, don, s'ou voulez nos joindre pour chanter deux'-trais cantiques, j'pouôrrions êt' bein heûtheux d' vos vaie.

Quand même qué je d'meuthe en Jèrri pour pus dé chînquante ans, i' y' a acouo des pliaiches qué jé n'connais pon. Par exempl'ye, l'aut' jour ma bouônnefemme et mé, j' feûnmes invitées pour aver eune fais à baithe aue nos anmîns pour célébrer ieune dé lus annivèrsaithes à eune maîson d'vacances à St Clément qu'il ont loué pour la fin d'la s'maine. La maîson d'vacances 'tait La Tou d'Nicolle ou en Angliais Nicolle Tower et Kirstie et mé, j'feûnmes bein surprîns à découvri qué jé n'l' avions janmais visité. La Tou d'Nicolle est eune maîson Victorienne mais ou n'est pon exactement eune maîson. Ou fut bâtie dans les mille huit chent vîngts par la fanmil'ye Nicolle ouaithes qu'i' y' avait ieu un bâtisse là dépis lé dgièx-septième siécl'ye et ch'est 'un folli Victorien'. Il est hardi p'tit en d'dans mais hardi pliaîsant. La partie p'ncipale est comme eune forme dé sièx-carres et au bas i' y' a eune p'tite tchuisînne, aue un p'tit parleux au préchain nivé et à haut i' y' a la chambre qu'les Allémands ajoutîtent duthant la dgèrre et fitent sèrvi comme un 'lookout'. En d'houors d'la tou, i' y' a un clios et eune pliaiche pour mangi les r'pas. Mais tch'est qu'est hardi mangnifique est la veue. Nou peux vaie la belle France et eune grand' partie dé l'Est dé Jèrri. Nou peut s'înmaginner qué dans l'Été ch'est un mangnifique endroit pour passer eune séthée èrgardant les batchieaux sus la mé.

Ma visite à la Tou d'Nicolle m'èrsouvînt qué tchique fais nou peut oublier toutes les mangnifiques choses tchi sont dans l's alentours. Par exempl'ye, duthant l'Été Kirstie et mé, j'feûnmes à la côte du Sud d'la France aue un aut' coupl'ye pour nous vacances. J'restîmmes dans eune belle petite ville tchi s'appelle Cavalière. Ch'tait hardi bé aue eune grand' grève

est un tas d'restaurants et d's aubèges. La côte là est un mélange dé grandes grèves sablionneuses et les p'tits hâvres rotcheux. Un jour j'trouvînmes un p'tit hâvre où'est qu'i' y' avait raique deux'-trais aut's gens et nos anmîns nos dîtent Ahh...Ch'est absolument mangnifique, n'est-che pon! Nou n'peut pon trouver eune pliaiche comme chennechîn siez nous!" Vraîment i'tait bein naice, mais à vîngt-trais dégrés la mé 'tait trop caude pour mé, jé n' pus pon m'èrfraidgi! Duthant les tchînze jours qué j'y' étions, la tempéthatuthe 'tait pus qué trente-deux dégrés et pour ma bouônnefemme et mé ch'tait trop caud! Heûtheusement deux'-trais jours auprès qué j'èrtouônnînmes en Jèrri, j'décidis d'faithe eune bangnole à Belcroute. Quand j'arrivis sus la grève i' n' y' avait absolument pèrsonne sus la grève et j'eus eune mangnifique nag'gie dans la mé fraîche – supèrbe!

Don, ch'en est assez dé mé pour aniet. J'voudrais prendre chute opportunité d'vos souhaiter un Bouan Noué et eune Bouanne Année. À la préchainé. À bi.